

Tí xroon k'uáyéhe tí sín Hebreos

Dios nixjaxin ch'án tí Xjeen ch'án

¹ A ntá tí imá ósé Dios mé nixjehe tí sín tsík'axrjeníxinni nchónhya veces kixin nchónhya nkexrí chrókiexín sín, nixjaxin ch'án tí sín k'uéchrónka tí itén ch'án.

² A ntá jie tió tsjixixín Dios nixjaxin ch'án tí Xjeen ch'án, na mé Dios kjuích'éna ch'án kaín xín nkehe síin kixin kjuachaxién tí Xjeen ch'án, mé tí nkexro k'uáyéhe kaín xín nkehe.

³ Jehé ch'án mé t'inkaséyanxín ch'án tí kjuachaxin kuènte Dios, la ko jehe ch'án mé kjaxin éxi tsjehe Dios xikaha tsjehe tí jehe ch'án. Jehé ch'án t'aykonhen ch'án kaín xín nkehe síin kixin tí kjuachaxin jie chóna tí tan nixja ch'án. A ntá kjuixin kjuínchetjóá ch'án tí jie chóntani, ntá sákjuj ch'án kjuák'etjaxin ch'án tí tja chjina It'é ch'án tí tjen ch'án t'etoan ch'án nkaya nkajní.

Tí Xjeen Dios imá t'etoan, a ntá tí sín ángel la kénhyó

⁴ Tí Xjeen Dios k'uáyéhe ch'án kjuachaxin ts'etuenhen tí sín ángel, kixin tsík'áyéhe ch'án tí kjuachaxin kuènte It'é ch'án, a ntá imá t'etoan ch'án, a ntá tí jehe sín la náhí.

⁵ Méxra Dios ntáchehya nijnko ángel kixin:
Jaha mé Xjanna,
janhan mé kjuít'ána tí jaha ijie.

la ko kjaxin ntáchrohya Dios kuènte nijnko ángel kixin:

Janhan mé chrók'óna It'é ch'án,

la ko jehe ch'án mé chrók'óna xjanna.*

⁶ A ntá tió kui tí jnkokoá Xjeen Dios chjasintajni, ntá ntáchro Dios kixin:

Kaín tí sín ángel kuènte Dios chrókjuikosáyehe tí jehe ch'án.†

⁷ A ntá ntáchro Dios kuènte tí sín ángel kixin:

Tí sín ángel ch'éna ch'án éxí xrinto kixin nchakuen sín ó,

la ko tí sín ch'ehe ch'án xra la ch'éna ch'án éxí xrohinene.‡

⁸ A ntá ntáche ch'án tí Xjeen ch'án kixin:

Tí trono kuéntá itjen jnkochrixin, jaha Dios,

la mé jaha mé ijnko nkexro t'etoan jina.

⁹ Jaha tóxrjínhan tí nkehe jina, a ntá ninkákonhén tí nkehe jinahya.

Mé xikaha tí Dios tsíkjejá jaha, la Dios kuéntá kjuíntacháha má,

a ntá tí í so sín k'uájikoa la kánhyó.§

¹⁰ Kjaxin ntáchro kixin:

Jaha Ìnchéni, tí xrankixín kjuich'éna chjasintajni, la ko jaha kjuich'éna nkajní.

¹¹ Táha mé ts'itjáyan, a ntá jaha la tsjak'e jnkochrixin.

Kaín tíha tsontaxín éxí iké chojni,

¹² éxí ijnko iké chojni xikaha tsoxrát'o,

ts'ixinkí éxí ijnko iké chojni.

A ntá jaha la ts'ixitóxinhya jnkochrixin tsjak'e,

* **1:5** Salmo 2.7; 2 Samuel 7.14; 1 Crónicas 17.13 † **1:6**

Deuteronomio 32.43 ‡ **1:7** Salmo 104.4 § **1:9** 1.8-9 Salmo 45.6-7

a ntá tí kjuachón chonta jaha la nunca tsjejehya.*

¹³ Dios la ntáchehya nijnko tí sín ángel kuènte ch'án kixin chrók'uejó sín tja ch'án chjina ntahó chrók'ueṭoan sín, tsjixinjian kaín xín tí sín nínkakonhen sín la chrókjuachahya sín chrók'ueṭoan sín.†

¹⁴ Kaín tí sín ángel mé nchakuen sín ó mé ch'ehe Dios xra mé k'uítuenhen sín tsjinkitsa tí sín ts'áyéhe kjuachaxin tsaá sín.

2

Chrókjoniēhyani tí nkehe tsaáxinni

¹ Mé xikaha chrókjuenkayáxinni jína tí nkehe ó kuínhinni kixin chrókuítóehyani tí ntja ó kuákjani.

² A ntá tí tan tsíchrónka tí sín ángel ósé la mé tsikónoxín kixin chaxín tíha. A ntá tí sín kuítekakonhya sín tí tan jína kuínhin sín la kjuasin sín jie, na mé kjuasóte sín la táhó mé kjuacha sín.

³ ¿Xá nkexrí chrókuaáni tí chrókuaahyani kuentá tí nkehe jie chrókuaáxinni? Jehé Ìnchéni tsíchrónka ch'án saoxín nkexrí chrókuaáxinni, a ntá chr'éxín tí sín tsíkinhin mé kjuakohe sín tí jeheni.

⁴ Méxra Dios kjuakoxín ch'án kjuaxroan jie la ko kjuachaxin jie kixin chaxín tíha, la ko noexínni kaín tí kjuachaxién Nchakuen ch'án tsík'áyéheni éxí tjinkaon ch'án tsjanjon ch'án.

Jesucristo k'óna ch'án chojni

⁵ Dios la tsíchjéhya tí sín ángel kjuachaxin kixin chrók'ueṭoan chjasintajni chr'éxín éxí tí jie tjejónixjani.

* **1:12** 1.10-12 Salmo 102.25-27 † **1:13** Salmo 110.1

6 Náhí. Éxí nixja xroon itén Dios chronkaxín kixin:

¿Xá nkexéhe tí chojni a, jaha It'éni Dios, kixin imá xráxinkávan tí jehe ch'án?

¿Xá nkexro tíha kixin imá tóxakonhan kixin tí jehe ch'án?

7 Jaha tsíkjich'éna ch'án éxí ijnko chojni t'etuanhya kjánchó kánhyó isé, a ntá tí sín ángel antsí má k'uéchónta sín kjuachaxin,

a ntá jie la imá kjuíkosáyehé ch'án;

8 la jaha tsíchjehé ch'án kjuachaxin kixin kaín nkehe ts'etuenhen ch'án.*

Mé xikaha ntáchro tíha kixin tsíchjéhe Dios tí chojni kjuachaxin kixin chrók'uetuenhen ch'án kaín xín nkehe, ntá Dios kuítóehya ninkehó nkehe chrókuitekakuenhya ch'án. Kjánchó naxa t'ikonhyani kixin á kaín nkehe titekakonhen ch'án.

9 Kjánchó ó noheni kixin Jesús la tsíkjich'éna Dios éxí chojni t'etuanhya kjánchó kánhyó isé, a ntá tí sín ángel antsí má k'uéchónta sín kjuachaxin. Dios mé tjuèhe kaín xín chojni ntá tjinkaon ch'án kixin ch'ín Jesús chrók'uenyákonhen kaín chojni. A ntá jie tsík'áyéhé ch'án kjuachaxin náxrjón la ko Dios tjikosáyehé tí jehe ch'án kixin tí kjuasóte ch'án, ik'uén ch'án.

10 Kaín nkehe siín la kuènte Dios la ko tjejó kixin tí kjuachaxin kuènte tí jehe ch'án. A ntá Dios tjinkaon ch'án kixin kaín xín tí xjeen ch'án chrók'uejó sín tí tjen ch'án tí t'inkaséyan. Méxra Dios kjuanjon Ìnchéni Jesucristo kixin tsjasóte ch'án kixin ntá jína kjuakoxin ch'án kixin ntá jehe ch'án tsaáxinni ch'án.

* 2:8 2.6-8 Salmo 8.4-6

11 Kaín tí sín tsíkótjóá la ko tí nkexro kjuínchetjóá na mé chón_ta jnkokoá It'é. Méxra tí Xjeen Dios tósuèhya ch'án tsontáchro ch'án kixin kichó ch'án tí jehe sín.

12 Éxí ntáchro tí xroon itén Dios kixin: Tsochénkani tí sín kichó ni kixin nkexro tí jaha, tsjikosáyahani tsotsjeni himno tí tójnkotsékoni tí sín kichó ni.†

13 Kjaxin ntáchro kixin:

Janhan títekavan Dios.‡

La ko kjaxin ntáchro ínaá kixin:

Ntihi tjékian tí xjeen Dios tsíkjanjon ch'án tsík'ayáha.§

14 A ntá tí xjeen chojni mé jnkokoá kichó la k'óna nto la ko ijni; la kjaxin ch'ín Jesús xikaha tsík'óna ch'án nto la ko ijni kixin jina its'en ch'án kixin jina sinchek'itjáyan ch'án tí nkexro chón_ta kjuachaxin t'óyán chojni, na mé t'axrjexín kixin diablo tíha,

15 mé xikaha chrókjuinchekaá ch'án kaín tí sín chrakonhen sín tí kjuach'en, tjejó sín éxí t'ítuenhen sín kaín yaon tjejó sín.

16 Kjaxin kuihya ch'án kixin chrókjuinkitsa ch'án tí sín ángel. Náhí. Ikui ch'án kixin tsjinkitsa ch'án tí sín tsík'axrjeníxin ch'ín Abraham.

17 A ntá t'ichjánxin chrókóyóhe ch'án éxí tí sín kichó ch'án kixin jina chrók'óna ch'án nchat'á t'etōan kuènte Dios la chrókuiikonóeheni ch'án, ntá jina tsjatsen ch'án ijje kaín chojni kixin k'uenyákonhenni ch'án.

18 Kixin jehe ch'án kjuasóte ch'án la ko tí Jínahya tjinkaon chrókjuachroe ch'án la kjuachahya, a ntá

† 2:12 Salmo 22.22 ‡ 2:13 Isaías 8.17,18 § 2:13 Isaías 8.17,18

jie la jína tsjinkĩtsa ch'án tí sín chrókjuachroe tí Jínahya kixin chrókjuasinhya sín jie.

3

Antsí tjetooan ch'ín Jesús, a ntá ch'ín Moisés la kánhyó

¹ A ntá kichó ni, jahará la tsíkótjóará, la mé Dios tsík'íyahará ch'án kixin ts'ónará xjeen ch'án, a ntá chróxraxinkáonrá jína Cristo Jesús na mé jehe ch'án mé tí apóstol la ko tí nchãt'á t'etooan kuènte tí nkehe tinkáchónkini.

² Tí ch'ín Jesús jína kuítekakonhen ch'án Dios, mé tí nkexro tsíkjeýá ch'án sich'ehe ch'án xra, éxí kjaxin ch'ín Moisés jína kjuích'e ch'án xra k'uáyakonhen ch'án ntoe Dios.

³ Dios antsí kjuikosáyehe tí ch'ín Jesús, a ntá ch'ín Moisés la kénhyó, éxí antsí tjikosáyehe sín tí nkexro kjuích'éna ijnko nchia, a ntá tí nchia la kénhyó tjikosáyehe sín.

⁴ Jnkojnko nchia k'óna kixin siín nkexro kjuích'éna, kjánchó Dios mé kjuích'éna kaín nkehe siín.

⁵ Ch'ín Moisés jína kjuích'e ch'án xra k'uáyakonhen ch'án tí nchia kuènte Dios. Tí xra kjuích'e ch'án mé k'uénixja ch'án kuènte tí nkehe tsontáchro Dios chr'éxin.

⁶ A ntá Cristo la mé Xjeen Dios tí jehe ch'án, ntá kjuínchexiteýá ch'án jína la t'ayakonhen ch'án tí nchia kuènte Dios, la tíha mé jeheni, kixin tí tsítøehyani ch'án la naxa tsinkáchónkini ch'án ntá tsøchéheni kixin tí nkehe tjejóchónhenni.

Ts'ok'éheni tí tjen Dios

7 Mé xikaha éxí ntáchro Nchakuen Dios nixja xroon itén Dios kixin:

A ntá jie tí chrókuinhínrá tí nkehe ntáchro Dios,

8 chrókjuich'ehyará éxí kjuích'e tí sín ósé kuítekakonhya sín Dios

tí yaon kjuích'ehe sín prueba Dios tí nteje.

9 A ntá ntaha tí sín tsík'axrjeníxinrá ósé kjuích'èna sín prueba,

kjonté cuarenta nánó k'uíkon sín tí xra kjuít'a.

10 Méxra kónínkakonhan tí chojni a,

ntáxrjan kixin: “Xráxín xrichoe asén sín, tjinkakonhya sín tsochóxin sín ntjaná.”

11 Méxra kónínkakonhan tí jehe sín, ntátjan sín kixin chaxín tsoxiteyá kixin ts'ixenhya sín ts'ok'éhe sín tí tjén janhan.*

12 Kíchóni, chrókóxakonhanrá kixin chrókókohya nijnko tí jahará chróchontará asánrá jínahya chrókuítóhéra Dios tjechón chrókuítekákuenhyará tí jehe ch'án.

13 Chrókjuinchechéhéra kíchuára jnkojnko yaon naxa tjen tiempo kixin nijnko tí jahará chrókjuenkayáxinrá kixin naxa chrókjuásinrá jie, í chróntáchrohya asánrá kixin naxa chrókójiáhará.

14 A ntá tí chrók'uejóni jnkojína hasta tsjixixín éxí kuinkáchónkini tí xrankíxixín, ntá siín kjuachaxin ts'ejókoni Cristo.

15 Mé xikaha ntáchro kixin:

A ntá jie tí chrókuinhínrá jahará tí nkehe ntáchro Dios,

chrókjuich'ehyará éxí kjuích'e tí sín ósé kuítekakonhya sín Dios.†

* 3:11 3.7-11 Salmo 95.7-11 † 3:15 Salmo 95.7-8

16 ¿A ntá nkexro tí sín kuínhin itén Dios, a ntá tí chr'éxin kuítekakonhya sín? ¿Á jehya kaín tí sín tsíkakitsjexín ch'ín Moisés tí nació n Egipto?

17 ¿A ntá nkexro tí kónínkakonhen Dios tí cuarenta nánó? ¿Á jehya tí sín kjuasin jie k'uénxin nteje?

18 ¿A ntá nkexro ntáche Dios kixin chaxín tsoxiteyá kixin ts'ixenhya sín ts'ok'éhe sín tí tjen tí jehe ch'án? ¿Á jehya tí sín kuítekakonhya?

19 A ntá ó noheni kixin kjuachahya sín k'uixenhen sín kixin kuítekakonhya sín.

4

1 Méxra, tsíntá chro Dios kixin tsjanjon ch'án kjuachaxin ts'ixenhenni ts'ok'éheni tí tjen ch'án, a ntá tóxakonhenni kixin ách'e jnkojín tí jahará chrókjuachahará chrók'uixenhenrá ntiha.

2 Kixin kjaxin jeheni kuínhinni itén ch'án tsaáxinni éxí kuínhin tí jehe sín, kjánchó tí jehe sín la ninkehó kjuínkítsahya sín tí tan jína kuínhin sín, kixin kjónté kuínhin sín tí tan na kuítekakonhya sín.

3 A ntá jeheni kuítekaonni, ntá ts'ixenhenni ts'ok'éheni ntaha, éxí tsíntá chro Dios kixin:

Méxra kóninkakonhan sín tí jehe sín ntátjan sín kixin chaxín tsoxiteyá

kixin ts'ixenhya sín ts'ok'éhe sín tí tjen janhan.*

Kixin Dios la tió kjuixinhin ch'án xra kjuích'éna ch'án chjasintajni ntá kjuák'e ch'án k'ok'éhe ch'án.

4 Mé xíkaha í jnko nketí nixja tí xroon itén Dios chrónka kuènte tí yaon yatoxin ntá chro kixin:

* 4:3 Salmo 95.11

Kjuixinhin Dios kaín xra ntá kjuák'e ch'án k'ok'éhe
ch'án tí yaon yatoxin.†

5 A ntá inaá ntáchro tí xroon itén Dios kixin:

Ts'ixenhya sín ts'ok'éhe sín tí tjén janhan.‡

6 Kjánchó naxa t'itjayan jnkojín chojni
chrók'uixenhen sín chrók'ok'éhe sín. A ntá tí sín
saoxín kuínhin tí tan chrókuaáxin sín la k'uixenhya
sín kixin kuítekakonhya sín tí tan a.

7 Méxra Dios tsíkjejá ch'án í jnko yaon, mé tí yaon
jie, a ntá chr'éxin nixjaxin ch'án tí nkehe tsíchrónka
ch'ín David éxí ntáchro tí xroon itén Dios kixin:

A ntá jie tí tsinhínra tí nkehe ntáchro Dios,
chrókjuiñchexiteyará.§

8 Kixin tí chrókjuanjon ch'ín Josué kjuachaxin
kixin chrók'ok'éhe tí sín israelita,* ntá Dios la í
chrónixjahya ch'án kuènte í jnko yaon.

9 A ntá naxa tjechónhen tí ts'ok'éhe tí sín
tinkáchónki Dios;

10 kixin tí nkexro ts'ixenhen ts'ok'éhe tí tjen Dios
tsíkjixinhin ch'án tí xra kuènte ch'án éxí yóhe kjaxin
Dios kjuixinhin ch'án tí xra kuènte ch'án ntá
kjuák'e ch'án k'ok'éhe ch'án.

11 T'ichjánxin kixin kaín asénni chrókjueyáni
nkexrí chrók'uixenhenni chrók'ok'éheni, kixin
chrókóyóehyani éxí tí sín kuítekakonhya.

12 Kixin tí itén Dios la mé tjechón la ko chóna
kjuachaxin. Tíha la imá taté, a ntá kánhyó taté
tí chica espada yánjín taté, la tíha mé t'ixenhen
tí ninka asén chojni la ko nchakuen chojni hasta
tí nkaya asén chojni. Tíha mé nchexraxinkaon

† 4:4 Génesis 2.2 ‡ 4:5 Salmo 95.11 § 4:7 Salmo 95.7-8 * 4:8
Josué 22.4

chojni kaín nkehe tjenkayáxin sín la ko kaín nkehe ntáchro asén sín.

¹³ Kohya ninkehó nkehe tsíkjach'éna Dios tsjacha chrók'uejóméhe tí jehe ch'án kixin kaín nkehe la noxín siín t'íkon tí nkexro ts'áyéhe kuentá.

Jesús mé tí nchat'á imá tjetooan

¹⁴ Jesús tí Xjeen Dios mé tí nchat'á tjetooan kuènténi mé k'uixenhen tí tjen Dios la méxra chrókuítøehyani tí tinkáchónkini tí jehe ch'án.

¹⁵ Méxra jehe ch'án mé tí nchat'á tjetooan kuènténi mé tsjinkitsa ch'án tí jeheni kixin fuértehyani kixin kjaxin tí Jínahya chrókjuachroe tí jehe ch'án éxí sítónhen tí jeheni, kjánchó jehe ch'án la ninkehó jie kjuasinhya ch'án kjónté xikaha kónhen ch'án.

¹⁶ Méxra kaín asénni chrókóchjineheni Dios tí tjen ch'án t'etooan ch'án kixin chrókuikonóeheni ch'án la ko chrókjuinkitsa ch'án tí jeheni tí nkehe chrók'uichjánxinhinni.

5

¹ Kaín nchat'á t'etooan tsíkónoxín la chojni ó, tsík'áyéhe xra tsonixayákonhen chojni nkayakon Dios, la ko tsjanjon nkehe la ko iko its'en kixin ts'itjáyanxín tí jie kuènte chojni.

² Kjaxin tí nchat'á a la fuértehyia kixin chojni ó, a ntá chrókóninkakuenhya ch'án tí sín noehya la ko tí sín tsíkjachroe.

³ Kjaxin jehe ch'án, kixin fuértehyia ch'án t'ichjánxin tsjanjon ch'án iko its'en kixin tí jie chóna ch'án jehe ch'án éxí tjanjon ch'án nkehe kuènte tí í so chojni chóna jie.

4 Ninkexró xitjahya jehó sich'éna asén nch'at'á t'et'otan. Náhi. Jehó tí sín tsík'jeyá Dios tsík'áyéhe tí xra éxi tsík'áyéhe ch'ín Aarón.

5 Mé xikaha Cristo, kjuích'énahya ch'án jehó ch'án asén ch'án nch'at'á t'et'otan. Náhi. Dios mé kjuikosáyehe ch'án mé tsík'janjon tí xra éxi tsíntáchro kixin:

Jaha mé xjanna;

Janhan mé kjuít'ána ijie.*

6 Kjaxin í jnko nketí nixja xroon itén Dios ntáchro kixin:

Jaha mé ijnko nch'at'á tsjak'e jnkochrín,

éxi yóhe k'uékjak'e ch'ín Melquisedec.†

7 Tió kjuák'e Cristo ntihi chjasintajni imá tsjánka ch'án la ko itsen chrónóehe ch'án Dios, kixin Dios chóna kjuachaxin chrókjuinchekaá ch'án kixin chrók'uenhya ch'án; la Dios la kuínhin kixin xikaha kuítekaon ch'án.

8 Méxra Cristo, kjónté Xjeen Dios, la kuítekaon ch'án kjuínchexiteyá ch'án kjónté tí kjuasote ch'án.

9 Mé kjuínchexiteyá ch'án, ntá kjuacha ch'án k'óna ch'án tí nkexro sinchekaá jnkochrín kaín tí chojni sinchexiteyéhe tí jehe ch'án.

10 A ntá Dios mé tsík'jich'éna ch'án nch'at'á t'et'otan éxi yóhe kjuák'e ch'ín Melquisedec.

Jehya jína chrókuítóheni tí tinkáchónkini Inchéni

11 Chóntani nchónhya nkehe chróchrónkani kuènte tíha, kjánchó imá xra chróchrónkaxínni tíha kixin tiénxinyará jahará.

12 Ntá k'uátsínka nchónhya tiempo, a ntá ó jína chrók'ónará maestro, ntá náhi kixin naxa

* 5:5 Salmo 2.7 † 5:6 Salmo 110.4

t'ichjánxìnhanrá nkexro chrókjuakohará ínaá tí nkehe xrahya kuènte itén Dios. Éxí xík'ónará lõtirá, t'ichjánxìn chrók'uirá tsjen ínaá kixin xitjahya sinterá nkehe cha.

¹³ A ntá tí sín it'i tsjen ó, na mé yóhē chánjan takí tsjachahya sín tsjeyá sín nkexrí chrók'uejó sín jína.

¹⁴ Á ntá tí nkehe cha mé ine tí chojni nteto kixin ó nohe sín ti nkehe jína la ko tí nkehe jínahya.

6

¹ Naxa chrókjueyáni kixin jína chrókjuenkayáxinni éxí chojni nteto. Chróchenkahyani tí jahará ijie tí nkehe kánhyó xra tsíxrakohará tí xrankíxín kuènte Cristo. Náhí. T'ichjánxínhya naxa chrókjuakoharáni kixin chrókuítóhérá tí jie k'uékjásinrá chrók'uénxinrá, la ko nkexrí chrókuinkachónkirá Dios,

² la ko nkexrí chrókuikite chojni, la ko nkexrí ts'ejotja tjára chrítaón tí sín tinkáchónki Cristo, la ko nkexrí tsoxechón chojni tsík'en, la ko nkexrí chrókuítóexín ijíé chojni.

³ A ntá tí Dios chrókjuanjon kjuachaxin la chrókjuakoni í so nkehe.

⁴ A ntá tí sín ó tsík'áyéhe sín tí xrohi, la ko ó tsjexín sín tí nkehe kjuanjon Dios, la ko tsík'áyéhe sín tí Nchakuen Dios,

⁵ la ko kóxrjínhìn sín tí nkehe jína kuènte itén Dios, la ko kónohe sín nkexrí tí kjuachaxin tsochóna tí chjasintajni chr'éxìn,

⁶ a ntá tí chrókuítóhe sín Dios, í chrókuinkáchónkihya sín, ntá xitjahya tsokjan sín ínaá, kixin tí xíkaha la éxí chrókjuak'enkanı sín

ntacruz tí Xjeen Dios ínaá la ko chrókjuanoá sín ch'án nkayakon nchónhya chojni.

⁷ Éxí nonte jnkojnko vez t'aniá chrin la tsjátan la ts'óna jína, a ntá kjuacha tí sín kjuích'e xra kixin Dios kjuíncheyaon ntiha.

⁸ A ntá tí t'óna ntach'i la ko kach'i la ninkehó sínkíhya la tsonínkakonhen Dios, la tí tsjixixín mé tsoche.

Tí nkehe tjejóchónhenni mé tjinkitsa kixin jína ts'ejóni

⁹ Kjónté nixjani xikaha, kichó ni, ó noheni kixin chaxín jína tjejorá k'uitjará tí ntia tsaáxinrá.

¹⁰ Kixin Dios la jína, la ts'itjáyenhya ch'án tí xra jína tjejoch'erá kixin tjuèherá kichuárá, mé xikaha kjuákoxinrá kixin kjuínkitsará tí kichuárá tinkáchónki Cristo la naxa tjejótjinkitsará sín xikaha.

¹¹ Tjinkaonni kixin jnkojnkorá chrókjuákoxinrá hasta tsjixixín kixin chontará kjuachéhe chrókjuínkitsará kichuárá kixin chaxín ts'ayéherá tí nkehe tjejochonhénra.

¹² Tjinkakonhyani kixin chrókjanrá chrókósáhará. Náhí. Tjinkaonni kixin chrókjuákoxinrá éxí tí sín chaxín tinkáchónki Ìnchéni tjejóchónhen sín ts'áyéhe sín tí nkehe tsíntácho Dios kixin tsjanjon ch'án.

¹³ A ntá Dios, tíó tsíntácho ch'án kixin tsjanjon ch'án nkehe ts'áyéhe tí ch'ín Abraham la jehó Dios k'uákjenxin asén kixin kohya nkexro antsí tjeoan chrók'uákjenxin ch'án.

14 Ntáchro ch'án kixin chaxín sincheyaon ch'án tí ch'ín Abraham la ko nchónhya chojni ts'axrjenixin tí jehe ch'án.*

15 Ch'ín Abraham kjuák'echónhen ch'án isé kixin ts'áyéhe ch'án tí nkehe tsintáchro Dios.

16 A ntá tió t'ákjenxin chojni ijnko nkexro la mé t'ákjenxin sín ijnko nkexro antsí tjetóan, a ntá jehó sín la náhi. A ntá ts'ákjenxin sín tí xikaha kixin ijnko nkehe tsoxiteyá, a ntá kohya nkexro tsontáchro ninkehó.

17 Méxra Dios k'uákjenxin ch'án asén ch'án tsintáchro ch'án kixin chaxín tsoxiteyá, kixin tjinkaon ch'án chrókjuakoxin ch'án noxín kixin chrókónohe tí sín ts'áyéhe tí nkehe tsjanjon ch'án kixin sinchexiteyá ch'án tí nkehe tsintáchro ch'án la í tsjitóxiénhya ch'án ninkehó tíha.

18 Mé xikaha siín yaá nkehe xitjahya ts'ixitóxin, kixin Dios la xitjahya sich'ia; kixin tíha Dios nchenoexínni kixin chaxín tsoxiteyá, la mé jeheni kjuancheheni ch'án kixin chrók'uayakonhenni ch'án la ko tjejóchónhenni tí nkehe tsjanjon ch'án.

19 Tí tjejóchónhenni xikaha la jína ts'ejó asénni éxi yóhe tí ntabarco chóna gancho tjechruéxin kixin kohya nketí sátsji. Méxra xikaha kjaxin tí nkehe tjejóchónhenni la sátsíkji hasta nóton tí ka cortina tjen nkaxenhen ninko tjen nkaya nkajní,

20 tí senó k'uíxénhen Jesús kuakitjehé ch'án ijnko ntja ts'ixenxínni. Mé xikaha jehe ch'án k'óna ch'án nchat'a t'etóan jnkochrixin éxi yóhe kjuák'e tí ch'ín Melquisedec.

* 6:14 Génesis 22.16-17

7

Ch'ín Jesús mé nchaṭ'á éxí yóhē k'uéjyak'e ch'ín Melquisedec

¹ Tí ch'ín Melquisedec mé k'ué rey kuènte ch-jasin Salem la ko nchaṭ'á kuènte Dios tjen nkaya nkajní. A ntá tió ch'ín Abraham kjanxin ch'án tí tsíkjikjanjonko ch'án tí í so sín rey, kjuacha ch'án, ntá ch'ín Melquisedec kjuíxinhin ch'án ntia ikui ch'ín Abraham, ntá jehe ch'ín Melquisedec kjuíncheyaon ch'án tí ch'ín Abraham.

² A ntá tí ch'ín Abraham chjéhe ch'án tí ch'ín Melquisedec diezmo kaín xín nkehe tsíkjacha ch'án tí tsíkjikjanjonko ch'án tí sín rey.* A ntá ihnié ch'ín Melquisedec mé t'axrjexín saoxín kixin “ijnko rey jina”; a ntá jehe ch'án k'ué rey kuènte ch-jasin Salem, tíha mé t'axrjexín kixin “kjuaxróxin”, la mé xikaha jehe ch'án mé “ijnko rey tjanjon kjuaxróxin”.

³ A ntá ch'ín Melquisedec la noehya sín nkexro it'é ch'án la ko nkexro ìné ch'án la ko nkexro tsík'axrjenixin ch'án; la ko noehya sin nkesá tsík'okjíhi ch'án la ko nkesá tsík'en ch'án. Mé xikaha tóyóhē tí Xjeen Dios kixin jehe ch'án mé ijnko nchaṭ'á jnkochrixin.

⁴ A ntá jie, tsjehérá kixin imá t'etoan tí ch'ín Melquisedec kixin tí ch'ín Abraham k'uaxrjenixinni, la tsíchjéhe ch'án tí ch'ín Melquisedec diezmo tí nkehe tsíkjacha ch'án tí tsíkjanjonko ch'an tí sín rey.

⁵ Éxí nixja ley tsík'etoan ch'ín Moisés, kixin tí sín nchaṭ'á tsík'axrjenixin tí ch'ín Leví chóna sín

* 7:2 7.1-2 Génesis 14.17-20

kjuachaxin tsjanchehe sín kaín xín chojni diezmo kjónté naxa kjéhya sín, tsík'axrjeníxin sín tí ch'ín Abraham éxí tí jehe sín.

⁶ A ntá ch'ín Melquisedec, kjónté tsík'axrjeníxinhya ch'án tí ch'ín Leví, na mé kjuích'ehe ch'án cobra tí ch'ín Abraham, mé tí ch'ín tsík'áyéhe tí nkehe tsíntáchro Dios. Mé xikaha tí ch'ín Melquisedec tsíkjincheyaon ch'án tí ch'ín Abraham.

⁷ Kohya nkexro tsontáchro kíxin chaxínhya kíxin tí nkexro ncheyaon la antsí má t'etoan, a ntá tí nkexro tsikóyaon la t'etoanhya. Náhí.

⁸ A ntá tí tjejóni, tí sín t'áyéhe tí diezmo la mé chojni ts'en ó. Kjánchó ntáchro tí xroon itén Dios kíxin tí ch'ín Melquisedec mé ijnko chojni naxa tsík'enhya, la naxa tjechón.

⁹ Mé t'axrjexín kíxin ch'ín Leví la ko kaín xín tí sín nchát'á tsík'axrjeníxin ch'án, mé tí sín t'áyéhe sín diezmo jie, la mé kjaxin jehe sín tsíkjenkehe sín diezmo tí ch'ín Melquisedec tió tsíkjenka ch'ín Abraham,

¹⁰ kíxin naxa tjiko cuerpo kuènte ch'án tí sín ts'axrjeníxin ch'án, naxa kokjéhya sín tió xeta ch'án tí ch'ín Melquisedec.

¹¹ Tí sín nación Israel tsík'áyéhe sín tí ley kíxin tí sín nchát'á levita, mé tsík'axrjeníxin sín tí ch'ín Aarón. A ntá jie tí chaxín chrókjuacha sín chrókjuentoá sín tí sín tinkáchónki tí ley, la í t'ichjánxinhya naxa chrókónoxín í jnko nchát'á í chrókóyóehya éxí tí ch'ín Aarón. A ntá kjuachahya sín xikaha ntá t'ichjánxin chrókónoxín ijnko nchát'á chrókóyóehé éxí tí ch'ín Melquisedec.

12 A ntá tí chrók'uíxinkí tí nchaṭ'á la kjaṭin chrók'uíxinkí tí ley.

13 A ntá tí xroon itén Dios chrónka tíhi kuènte Ìnchéni. A ntá jehe ch'án la tsík'axrjeníxin ch'án í jnko nkexro kuènte Israel la kohya ninkexró tsík'óna nchaṭ'á tsík'axrjeníxin tí sín a.

14 Kíxin ó noxín kíxin Ìnchéni tsík'axrjeníxin ch'án tí ch'ín Judá, a ntá ch'ín Moisés la chrónkahya ch'án ninkehó kuènte tí sín ts'axrjeníxin tí ch'ín a tió nixja ch'án kuènte tí sín nchaṭ'á.

15 A ntá tíhi la aṅsí má kónoxín kíxin tí nchaṭ'á nṭixin la tóyóhē éxí ch'ín Melquisedec

16 kíxin tió k'óna ch'án nchaṭ'á la jehya kíxin xikaha chrók'uętoan ijnko ley kíxin nkexro chrók'uaxrjeníxin ch'án. Náhi. Ó jehí k'óna ch'án nchaṭ'á kíxin tí kjuachaxin chóna ch'án la xitjahya ts'itjáyan.

17 Kíxin nixja Dios kíxin nkexrí tjen tí jehe ch'án, ntáchro kíxin:

Jaha mé ijnko nchaṭ'á tsjak'e jnkochríxín,
éxí yóhē k'uékjak'e ch'ín Melquisedec.†

18 Méxra tí nkehe k'uék'ętoan senó mé ch'ehya xra jie kíxin kánhyó kjuachaxin k'uéchóna la ko kjuachahya,

19 kíxin tí nkehe k'uętoan ch'ín Moisés kjuachahya kjuínchetjóá ninkehó nkehe. A ntá jie chónani ijnko nkehe aṅsi jína tjejóchónhenni kíxin tíha mé aṅsí jína tsochjinexínni Dios.

20 A ntá tió ntáchro Dios tíha la tsík'ákjenxín ch'án aṣén ch'án jehó ch'án.

† 7:17 Salmo 110.4

21 La ntá tí í so nchaṭ'á, tió tsíkónoxín sín, tsík'ákjenxinhya Dios asén ch'án. A ntá tió tsíkónoxín tí nchaṭ'á i la Dios tsík'ákjenxín ch'án asén ch'án. A ntá ntáchro xroon itén Dios kixin:

Ìnchéni tsík'ákjenxín asén ch'án

a ntá ts'ixitóxinhya tí nkehe tsintáchro ch'án:

“Jaha mé ijnko nchaṭ'á tsjak'e jnkochrín

éxí yóhe k'uékjak'e ch'ín Melquisedec.”‡

22 Méxra ch'ín Jesús ntáchro kixin tí pacto t'etōan ch'án la antsí má jina, a ntá tí pacto senó la náhí.

23 Ntá k'uixin nchónhya sín nchaṭ'á, kjánchó nkák'en sín, ntá xitjahya naxa chrókjuich'e sín tí xra a.

24 A ntá ch'ín Jesús la ts'enhya ch'án la t'ichjánxinhya kixin í jnko nkexro chrókuakja tí xra kuènte ch'án chrók'óna nchaṭ'á.

25 Méxra jehe ch'án tsjacha sinchekaá ch'án jnkochrín tí sín tsochjinehe Dios kixin tinkáchónki sín tí jehe ch'án kixin itjen ch'án jnkochrín chrónóhe ch'án Dios kixin chrókjuinchekaáni ch'án.

26 Mé xikaha Jesús mé tí nchaṭ'á t'etōan t'ichjánxinhinni; jehe ch'án mé ijnko nkexro tjóá, chóntahya ninkehó jie, la ko tjenkákjanhya ch'án tí sín tjasin jie, a ntá sákjui ch'án nkaya nkajní.

27 Ntá tóyóehya tí í so nchaṭ'á t'etōan, kixin t'ichjánxín ts'óyán sín iko tsjanjon sín tsochjéhe sín Dios kaín yaon, saoxín kixin tí jie kuènte sín, a ntá chr'éxin kixin tí jie chóna tí í so chojni. A ntá ch'ín Jesús jnkokoaxón vez kjuanjon asén ch'án ik'uén ch'án.

‡ 7:21 Salmo 110.4

28 Tí ley k'uék'et̄oan ch'ín Moisés t'et̄oan kixin chojni naxa chóna jie chrók'óna nchat'á, a ntá Dios tsík'ákjexin asén ch'án tió kjuixin k'óna tí ley, ntáchro ch'án kixin tí Xjeen ch'án mé ts'óna nchat'á t'et̄oan kixin jína kjuínchexiteyá ch'án jnkochrín.

8

Ch'ín Jesús nixjaxin ch'án ijnko pacto nixin

1 Tí nkehe antsí má tjet̄oan chrónkani la mé tíhi kixin tí nchat'á kuènteni mé t'et̄oan ch'án, la ko tjetjaxin ch'án nkaya nkajní, nó chjina tí trono t'et̄oanxín Dios,

2 k'óna ch'án nchat'á tí njnko chaxín tsíkjich'éna Ìnchéni, la jehya chojni tsíkjich'éna tíha.

3 Kaín nchat'á t'et̄oan tsík'áyéhe xra kixin tsjanjon nkehe la ko iko its'en. Méxra Jesucristo t'ichjánxin kixin tsjanjon ch'án ichrén nkehe.

4 Tí chrókjuak'e ch'án chjasintajni, chrók'ónahya ch'án nchat'á kixin naxa siín nchat'á tjanjon nkehe k'uet̄oan tí ley tsík'áyéhe ch'ín Moisés.

5 A ntá tí sín nchat'á k'uékjanjon nkehe tóyóhó tí nkehe siín nkaya nkajní. Noheni kixin tóyóhó kixin tió ch'ín Moisés chrókjuich'éna ch'án njnko la ntáche Dios tí jehe ch'án kixin: “Tjenkayáxian jína, a ntá sich'éna jaha éxí tí nkehe kjuákuáxian chrítaón jna.”*

6 A ntá tí nchat'á t'et̄oan kuènteni tjech'e ch'án xra antsí jína kixin jehe ch'án mé tí nkexro nixjaxin tí pacto nixin tsintáchro Dios chrónka tí nkehe jína tsonhen chr'éxin.

* 8:5 Éxodo 25.40

7 **A** ntá tí pacto tsík'etōan saoxín la tí chróxiteyá jína, la t'ichjánxinhya chrók'óna yóxin pacto.

8 **A** ntá Dios k'uíkon kixin kjuínchexiteyáhya tí sín a, éxí ntáchro xroon itén Dios kixin:

Ntáchro Ìnchéni kixin: Itsi ijnko yaon

mé tsjánjuan ijnko pacto nixin tsochóna tí sín nación Israel la ko tí sín chjasin Judá.

9 Jehya xikaha tí pacto kuétuñhan tí sín tsík'axrjeníxinrá ósé,

tí yaon kjuínkítsa sín k'uaxrjexín sín tí nación Egipto;

kjánchó kjuínchexiteyáhya sín tí pacto kuétuñhan sín,

méxra kuitōha sín, ichro Ìnchéni.

10 Tí pacto tsétuñhan tí sín chjasin Israel tió ts'atsínka tí yaon a, mé xikaha tíhi, ichro Ìnchéni:

Sjintaxráinkavan asén sín tí ley tsétōan,

a ntá tí kjuaxrexinkaon kuènte sín tsokjian tí nkehe tsétuñhan sín.

A ntá janhan ts'óna Dios kuènte sín,

a ntá jehe sín mé ts'óna chjasin kuèntana.

11 Ts'ichjánxinhya naxa tsjakōhe kichó sín

kixin chróchóxin sín Ìnchéni,

kixin kaín sín tsochóxinna sín,

kjonté chojni imá ntsíntsí la ko chojni imá hyé.

12 Sjintak'itjáyan tí nkehe jínahya kjuích'e sín

la ko í tsoxráinkakonhya inaá tí jie chóna sín.†

13 Xikaha nixja Dios kuènte tí pacto nixin ts'etōan ch'án kixin tsíkóntaxin tí pacto saoxín k'uētōan

† 8:12 8.8-12 Jeremías 31.31-34

ch'án, tíha mé tinkákóntaxin la ko tinkákjeje, na í séhya ts'itjáyán.

9

Tí n̄inko chjasintajni la ko tí n̄inko nkaya nkajní

¹ A ntá tí pacto saoxín t'et̄oan nkexrí chróxraxinkaonni Dios, kixin tí n̄inko ntihyó chjasintajni.

² A ntá tí n̄inko k'uékjak'e mé tí cuarto saoxín k'uekjinchek'in sín tí Cuarto Tjóa, tí kjuák'e tí candelero la ko tí mesa tjejókjen tí niotja k'uéxraxinkakonxín sín Dios.

³ Nóton tí yóxin ka cortina kjuák'e tí cuarto k'uekjinchek'in sín tí Cuarto Āntsí Tjóa.

⁴ Ntiha k'uékjak'e tí altar tsík'óna chica oro k'uékjakaxín sín tí chj̄inc̄o la ko k'uékjak'e tí ntacajón chr'ísimá chica oro tjenkáya tí pacto. Nkaxenhen tí ntacajón k'uékjak'e ijnko nchésen tsík'óna chica oro k'uék'inka maná k'óna niotja, la ko k̄axin k'uékjak'e tí nta k'uékjixín ch'ín Aarón kjuankixin k'uayan nta ntahnte, la ko k̄axin ntiha kjuák'e tí x̄o chóna tí tan k'uetoan Dios.

⁵ Chrítaón tí ntacajón k'uék'ejó yaá ángel tsíkjanoya tsíkjentoá kanenee chrítaón tí kjuák'e tí kjuachaxin kuènte Dios; ntaha k'uékj̄inxín tí j̄ie k'uéchóna chojni. A ntá ijie la t'ichj̄ánx̄inhya naxa tsonixjani kuènte tíha.

⁶ A ntá x̄ikaha k'uéjó tí nkehe a, a ntá tí sín nchat'á jnkoyaxón t'ixenhen sín tí cuarto saoxín kuènte n̄inko kixin tí x̄a ch'e sín kuènte n̄inko.

⁷ A ntá tí yóxin cuarto jehó tí nchat'á t'et̄oan t'ixenhen ch'án jnkokoá vez jnkojnko nánó; a ntá

tí t'ixenhen ch'án t'ichjánxin ts'ixenko ch'án ijnié iko tsochjéhe ch'án Dios tsotjuáxin ijié ch'án la ko ijié tí i so chojni.

⁸ A ntá tí Nchakuen Dios nchenoexínni tíhi kixin nachrohe k'uékjich'e xra tí cuarto saoxín la naxa tjexrankehya kixin chrók'uixenhenni tí Cuarto Antsí Tjóá.

⁹ Kaín tíha tjakoxin ijnko nkehe chrókónoheni jie, kjánchó tí nkehe chjéhe sín Dios la ko tí ko t'óyán sín xitjahya nchenoexín sín kixin á chaxín kótjóá tí jie k'uéchónta sín kixin xikaha k'uéxraxinkaon sín Dios.

¹⁰ A ntá tíha jehó t'etoan kuènte tí nkehe chrókjóne sín la ko tí nkehe chrók'ui sín la ko tí chrók'ónti sín kixin chrókótjuáxin ijié sín, kaín tíha mé k'uítuenhen sín kuènte cuerpo ó la jehó k'uéchónta kjuachaxin tí naxa kjuinkíhya Dios nkexrí chróxraxinkaon sín ch'án.

¹¹ A ntá ó kui Cristo, jehe ch'án mé nchat'á t'etoan kuènte tí nkehe antsí jína itsi. A ntá tí ninko ch'e ch'án xra la antsí jína la ko antsí ntoá, la jehya chojni tsíkjich'éna tíha kixin jehya chjasintajni ntihi tjen.

¹² Tió k'uixenhen Cristo tí Cuarto Tjóá, la jehya kixin chrókjuanjon ch'án ijnié kotèntso la ko ijnié koxintáxjan. Náhi. Ijnié ch'án kjuanjon ch'án; mé xikaha k'uixenhen ch'án jnkokoá vez ntiha mé xikaha kjuenkā ch'án kixin chrókuaáxinni jnkochrín.

¹³ A ntá tí ijnié koxinta la ko ijnié kotèntso la ko tí nteso kuènte tí koxintáxjan tsíchexín tí altar tikitexín tí sín tjuáhya la mé tíha chónka kjuachaxin tsotjuáxin tí chrítaón ó.

¹⁴ A ntá tí xikaha, la kjá antsí má chónka

kjuachaxin tí ijnié Cristo. Kíxin tí kjuachaxin Nchakuen Dios tjen jnkochrín, la Cristo kjuanjon asén ch'án ik'uén ch'án k'uáyéhe Dios, la jehe ch'án la ninkehó jie chóntahya ch'án. A ntá ijnié ch'án nchetjóá tí nkehe kjuích'eni senó chrók'uenxínni kíxin ntá jie la jína chrókjuich'eheni xra Dios tjechón.

¹⁵ Méxra Jesucristo nixjaxin ch'án tí pacto nixin k'ueṭoan Dios. Kíxin k'uenyákonhenni Cristo ntá tsotjuáxin tí jie kjuasinni kjuínchexiteyáhyani tí pacto k'uítuéhenni senó; kíxin tí sín k'uíyéhe Dios la jína chrók'uáyéhe sín tí nkehe tsjejehya kíxin jehe ch'án xikaha tsíntáchro ch'án tsjanjon ch'án.

¹⁶ A ntá tí siín ijnko nkehe tsíntáchro ijnko chojni kjuák'e na ntá ik'uén la t'ichjánxin tsonoxín kíxin chaxín tsík'en tí nkexro tsíkjich'éna.

¹⁷ A ntá tí nkehe tsíntáchro ch'án la sínkíhya tí naxa tjechón tí nkexro tsíkjich'éna; jehó tíó chrók'uen ch'án mé sínkí.

¹⁸ Méxra tí pacto xrankíxín tsík'etoan Dios kjuankíxin kjuích'e xra kíxin k'uíti ijni.

¹⁹ Ch'ín Moisés tsíchrónka ch'án kaín nkehe tsík'etoan tí ley kuínhin kaín tí chojni; a ntá chr'éxin kuákja ch'án ichjoén kolélo kjátse la koí ntarama hisopo, ntá kjuínchekjatjaxin ch'án ijnié koxintáxjan la ko ijnié kotèntso tsíkjiko ìnta, ntá kuikjanjin ch'án tí libro chóna ley la ko kuikjanjin ch'án kaín tí chojni.

²⁰ A ntá ntáchro ch'án kíxin: “Tí jni i tsoxiteyáxin tí pacto k'ueṭoan Dios chrókjuínchexiteyéherá jahará.”*

* 9:20 9.19-20 Éxodo 24.6-8

21 Tí ch'ín Moisés kjaxin kuikjanjin ch'án jni tí nínko la ko kaín nkehe t'ichjánxin tí nkaxenhen nínko.

22 Kíxin xikaha ntácho tí ley kixin kaín nkehe la chrókótjuáxin tí jni; a ntá xitjahya chrókótjóá tí jie tí chrók'uixikjanjinhya jni.

Tí ik'uén Cristo mé tsjinín ijéni

23 Méxra t'ichjánxin kixin ik'uén iko kótjuáxin tí nkehe a, táha mé tóyóhó tí nkehe síin nkaya nkajni; a ntá tí nkehe chaxín kuente nkaya nkajni t'ichjánxin ijnko nkehe antsí jina chrók'uen.

24 A ntá Cristo k'uixenhya tí nínko tsíkjach'énaxín chojni tja, táha mé ijnko nkehe tóyóhó tí nínko chaxín. Náhí. Jehé ch'án mé k'uixenhen ch'án tí nkaya nkajni, a ntá jie mé tjen ch'án tí tjen Dios nixjaxin ch'án kaín ni.

25 A ntá jehé ch'án la jehya jnkoyaxón k'uixenhen ch'án ntiha k'uenyákonhenni ch'án. Náhí. A ntá tí nchat'á t'etōan t'ixenhen tí Cuarto Tjóá jnkojnko nánó kixin tsjanjon ch'án ijnié ko ó.

26 A ntá tí xikaha chrókónhen Cristo la t'ichjánxin kixin jnkoyaxón chrók'óyán sín ch'án desde tí k'óna tí chjasintajni. A ntá jie la ó chjina, tsjixraká tsjeje chjasintajni, a ntá kónoxín Cristo la ik'uén ch'án jnkokoá vez kixin tsjinín ijéni.

27 Mé xikaha kaín ni its'enni jnkokoá vez, a ntá chr'éxin tsitōexín ijéni.

28 Mé xikaha kjaxin Cristo jnkokoá vez ik'uén ch'án kixin tsjinín ijé nchónhya chojni. A ntá chr'éxin itsi ch'án ínaá, jehya kixin naxa tsjatsen ch'án ijé chojni. Náhí. Sinchekaá ch'án tí chojni ó tsíkótjóá tjejóchónhen itsi ch'án.

10

¹ A ntá tí ley k'uet̄oanxín ch'ín Moisés la tóyóhó tí nkehe jína tsi la jehya tí nkehe chrókuaáxinni. Méxra tí ley kjuachahya kjuínchetjóa tí sín kóchjinehe Dios kjuanjon sín iko its'en jnkojnko nánó.

² A ntá tí chrókjuacha tí ley chrókjuinchetjóa ijíe sín, ntá chrókjuenkayáxinhya sín kixin naxa chróchóna sín jíe, la chrókuít̄ohe sín, í chrókjuanjonyha sín iko its'en.

³ A ntá xíkaha ich'e sín t'óyán sín ko, la jnkojnko nánó xraxinkakonxín sín tí jíe tsíkjasin sín

⁴ kixin ijníe koxinta la ko ijníe kot̄entso xitjahya tsjìinxín ijíe chojni.

⁵ A ntá tió Cristo kui chjasintajni ntáche ch'án Dios kixin:

Tjinkákonhya jaha iko its'en la ko tjinkákonhya jaha ninkehó nkehe chrók'uayéhé. Náhí.

Jaha tsíkjich'éna ijnko cuerpo kixin tsochonta janhan.

⁶ Jaha tóxrjíanhya iko tsíchján la ko tí í so nkehe chrókjuanjonni chrókjuakjìinxian ijíe.

⁷ A ntá ntátjan ch'án kixin: “A ntá ijie la ntihi tjén janhan kixin s̄intaxiteyá tí nkehe tóxrjínhan jaha Dios,

éxí nixja xroon chrónka nkexrí chrókjuít'a.”*

⁸ Senó ntáchro kixin Dios tjinkakonhya la ko tóxrjienhya ch'án iko its'en chrókjuanjonni la ko ninkehó nkehe chrókjuanjonni chrókjuìinxín ijíeni kjónté tí ley k'uet̄oan kixin xíkaha chrókónhen.

⁹ A ntá chr'éxin tsíntáchro kixin: “A ntá k'uinka janhan kixin s̄intaxiteyá tí nkehe tóxrjínhan jaha

* 10:7 10.5–7 Salmo 40.6–8

Dios,” ichro ch'án. Mé xikaha kjuatsen ch'án tí ko k'uék'óyán sín ósé, a ntá jehe ch'án kjuanjon ch'án ijnko nkehe nixin.

¹⁰ Dios kjuínchetjuáxinni kixin Jesucristo kjuínchexiteyá éxí tóxrjínhín Dios kixin tí cuerpo kuènte ch'án kjuanjon ch'án ik'uén ch'án jnkokoáxón vez para jnkochrixin.

¹¹ A ntá kaín nchať'á judío tí xra ch'e sín jnkojnko yaon la jnkokón nkehe its'en tjanjon sín kjánchó tíha la xitjahya tsjinxín ijié chojni.

¹² A ntá Jesucristo mé jnkokoá vez k'uenyákonhenni ch'án kixin tsotjuáxin ijiéni la tíha mé sich'e xra jnkochrixin. A ntá kjuixin ntá sákjui ch'án kjuák'etjaxin ch'án nó tí tja chjina kuènte Dios.

¹³ A ntá ntiha tjechónhen ch'án tsjixinjian kaín tí sín nínkakonhen ch'án tsjachahya sín ts'etōan sín.

¹⁴ Mé xikaha jnkokoá nkehe kjuích'e ch'án chjéhe ch'án Dios, kixin jína ts'ejó tí sín ó tsíkótjóá.

¹⁵ A ntá tí Nchakuen Dios nchenoheni tíhi kixin senó tsintáchro kixin:

¹⁶ Tí pacto tsotjahā tí jehe sín tió ts'atsínka tí yaon a, ichro Ìnchéni;

Sjintaxráxinkāvan asén sín tí ley tsétōan,

a ntá tí kjuaxrexinkaon kuènte sín tsokjian tí nkehe tjínkavan.†

¹⁷ Kjaxin ntáchro kixin:

Í tsoxráxinkākonhya inaá tí ijié sín la ko tí nkehe jínahya kjuích'e sín.‡

¹⁸ Mé xikaha tí ó kótjóá ijiéni la t'ichjánxinhya í so nkehe chrókjuanjoni chrókótjuáxin tí ijiéni.

† 10:16 10.16-17 Jeremías 31.33-34

‡ 10:17 10.16-17 Jeremías

31.33-34

Méxra t'ichjánxin tsochjineheni Dios

¹⁹ Kíchóni, a ntá la í kohya kjuachrakon ts'ixenhenni tí Cuarto Antsí Tjóá tí tjen Dios kixin kjuachaxién ijnié Jesucristo,

²⁰ chréheni tí ntia nixin mé tí ntia tjechón kuak-itjehe ch'án nóton tí ka cortina, tíha mé tí cuerpo kuènte ch'án.

²¹ Jesús mé tí nchat'á tjetóan kuènteni t'etóan tí ntóe Dios.

²² Méxra xikaha chrókóchjineheni Dios kaín asénni chrókuinkáchónkini ch'án chaxín kixin jehe ch'án tsíkjinchetjóá ch'án asénni kixin chrókjuenkayáxinhyani kixin naxa chóntani jie kixin tí cuerpo kuènteni kótjuáxin tí ntá jehó.Š

²³ Chrókuítóehyani chrók'uejóchónhenni tí nkehe tinkáchónkini kixin Dios la chaxín sinchexiteyá ch'án tí nkehe tsintáchro ch'án.

²⁴ Chrókjueyáni nkexrí chrókjuinkitsani kichó ni kixin chrótjuèheni kichó ni la chrókjuich'eni tí nkehe jína.

²⁵ Chrókuítóehyani chrókójnkotséni, chrókóyóehyani éxí tí sín í tójnkotséhya sín. Náhí. Chrókjuinchechéheni kichó ni antsí má jie kixin ó noheni kixin í séhya tsokjan Ìnchéni.

²⁶ A ntá tí naxa chrókjuenkayáxinni chrókjuasinni jie tí ó noheni tí nkehe chaxín, la kohya í jnko nkexro chrók'uenyákonhenni chrókótjuáxin tí jie chóntani.

²⁷ A ntá jehó itjen tí kjuachrakon jie tsitóexín jie la ko tí xrohi tjeche ts'itjáyanxín tí sín nínkakonhen Dios.

28 **A** ntá tí tjen jnkójín nkexro titekakonhya tí ley k'uetōanxín ch'ín Moisés, la tsonoxín yaá o y'á tí sín tsík'ikon tí jie tsíkjasin sín, tíha mé ts'enxín sín la kohya nkexro tsíkonóehē tí jehe sín.

29 ¿Á tjenkayáxinhyará kixin antsí má chrókjuasóte tí sín kuítékakuenhya tí Xjeen Dios la ko chóntehya sín kjuasáya tí ijñié ch'án la ko t'ántaxínhjn sín tí Nchakuen Dios tjuèheni? Kixin tí jñi chrónkaxín kixin ts'etoanxín tí pacto la ko tí jñi k'uíjmáxinni.

30 Noheni kixin tsíntáchro Ìnchéni kixin: “Janhan mé tóna tocar sñtakitoaxián ijñié chojni la ko janhan tsjénkahā sín.”* Kjaxin tsíntáchro kixin: “Ìnchéni sinchekitoexín ijñié tí sín tinkáchónki ch'án.”†

31 Méxra kjuachrakon jie chrók'uanótjenyáni tí tja Dios tjechón.

32 **A** ntá chróxráxinkáonrá jahará tí nkehe tsíkónhen ósé kixin tió jahará nantá tsík'ayéherá tí nkehe t'inkaséyan, a ntá kjuachará kjónté tí nchónhya nkehe tsíkónhanrá.

33 **A** ntá jnkójín tí jahará k'uántaxínhanrá sín la ko kjuatiará sín nkayakon nchónhya chojni, a ntá í so sín la kjuínkĩtsa tí sín tsík'ekon.

34 **A** ntá jahará kuikonóehérá tí sín tjejóchjina ntōechiso, a ntá jahará kóninkákonhyará kjónté k'uaxrjohará kaín nkehe chontará, kixin ó nohará kixin nkaya nkajní chontará nkehe antsí jína chónhya tsjeje.

* **10:30** Deuteronomio 32.35-36 † **10:30** Deuteronomio 32.35-36

³⁵ Chrókuítóéhyará tí nkehe tinkachónkirá ḱixin ó nohará ḱixin tíha mé ts'ayéxinrá nkehe chr'éxin.

³⁶ Kjaxin jahará t'ichjánxin chrók'uejochónhénrá chrókóninkákonhyará kjónté ichrén nkehe chrókónhanrá, ḱixin sich'erá tí nkehe tjinkaon Dios, ḱixin xikaha chrók'uayéhérá tí nkehe tsíntáchro tí jehe ch'án.

³⁷ Ḱixin xikaha ntáchro xroon itén Dios ḱixin: Kánhyó sé

itsi tí nkexro tsi, í sinchexrjenhya.

³⁸ Tí sín kótjóá asén mé tjejóchónxin sín ḱixin tinkáchónki sín Dios;

a ntá tí sín tsítóhe tí janhan la í tsochánahya tí xikaha ch'e sín.‡

³⁹ Kjánchó jeheni jehya xikaha chrókuítóheni chrókuinkáchónkihyani tí jehe ch'án ḱixin ntá chrókjuasinni jie chrók'uitjáyánxinni. Náhí. Tinkáchónkini ch'án la tíha chrókuaáxinni.

11

Tí fe

¹ Tí fe chóntani la mé noexínni chaxín ḱixin tsoxíteyá ts'áyéheni tí nkehe tjejóchónhenni, la ko noexínni chaxín ḱixin kjónté ijnko nkehe t'ikonhyani la chaxín tjen.

² Tí sín tsík'axrjeníxinni ósé la kóxrjínhin Dios ḱixin k'uéchóna sín fe.

³ Tí fe mé noexínni ḱixin Dios tsík'jich'éna kaín nkehe tí kjuachaxin tí nixja ch'án la ko noexínni ḱixin tí nkehe t'ikonni mé tsík'óna tí nkehe t'ikonhyani.

‡ 10:38 10.37-38 Habacuc 2.3-4

⁴ **A** ntá tí fe k'uéchónta ch'ín Abel mé k'óyán ch'án ijnko kolélo chjéhe ch'án Dios. Tíha ijnko nkehe antsí jína kjuanjon ch'án, a ntá tí nkehe tsíkjanjon ch'ín Caín la náhí. Méxra Dios kóxrjnhin tí nkehe kjuanjon ch'ín Abel ntá ntáchro Dios kixin jína tí ch'ín a. Kjonté ó tsík'en ch'ín Abel la tí nkehe tsíkjich'e ch'án naxa tjakoxin kixin jína tí fe k'uéchónta ch'án.*

⁵ **A** ntá tí fe k'uéchónta ch'ín Enoc la Dios sátsíkjiko tí jehe ch'án la k'uénhya ch'án, a ntá k'uitjahya sín ch'án kixin Dios sátsíkjiko. Naxa sákjuihya ch'án la xráxín kóxrjnhin Dios nkexrí k'uékjak'e ch'án.†

⁶ **A** ntá tí chróchóntahyani fe la xitjahya chrókjuinchechéheni Dios, kixin t'ichjánxin kixin tí sín chrókóchjinehe sín Dios chrókuitekaon sín kixin chaxín itjen ch'án la ko jehe ch'án tsjenkehe ch'án tí sín xritjeyá sín tí jehe ch'án.

⁷ **A** ntá tí fe k'uéchónta ch'ín Noé tí Dios chénka tí jehe ch'án tí nkehe naxa k'uíkonhya ch'án tsonhen, la kuítekaon ch'án kjuích'éna ch'án ntabarco kixin tsaáxin ch'án la ko tí sín naxa kjéhya ch'án. Tí fe k'uéchónta ch'án kjuakoxin kixin tí í so chojni ch-jasintajni la jínahya sín tsjasóte sín. **A** ntá kóxrjnhin Dios tí jehe ch'án kixin kuítekaon ch'án la tí xra kjuích'e ch'án mé kuaáxin ch'án.‡

⁸ **A** ntá tí fe k'uéchónta ch'ín Abraham tí k'uíyehé Dios tí jehe ch'án la kuítekaon ch'án sákjui ch'án tí nonte tsjanjon Dios ts'áyéhe ch'án, ntá k'uaxrjexín

* **11:4** Génesis 4.3-10 † **11:5** Génesis 5.21-24 ‡ **11:7** Génesis 6.13-22

ch'án chjasén ch'án kjónté noehya ch'án nketí nó sátsji ch'án. §

⁹ A ntá tí fe k'uéchónta ch'án k'uékjak'e ch'án tí nonte chrókjuanjon Dios, éxí jehya nontee ch'án tíha. Kjuák'e ch'án nchia tsík'óna ka, la ko kjaxin xikaha k'uéchónta ch'ín Isaac la ko ch'ín Jacob la ko kjaxin jehe sín tsík'áyéhe sín tí nkehe tsintáχρο Dios.*

¹⁰ A ntá ch'ín Abraham k'uékjak'echónhen ch'án tí chjasin tsíkjich'éna Dios ts'itjáyanhya.

¹¹ A ntá tí fe k'uéchónta tjan Sara kjónté ó nána tjan, k'uáyéhe tjan kjuachaxin sich'éna tjan ijnko xjan; a ntá kjuích'éna tjan ijnko xjan kixin kuítekaon tjan kixin Dios sinchexiteyá tí nkehe tsintáχρο ch'án. †

¹² Kjaxin xikaha ch'ín Abraham, kjónté ó mero chrók'uen ch'án kixin ó táda ch'án, la k'uaxrjenixin ch'án nchónhya chojni éxí konotsé siín nkajní o éxí nchesen siín chrínta ntayaon, xitjahya ts'ekini. ‡

¹³ A ntá kaín tí chojni a ik'uén sín k'uáyèhya sín tí nkehe tsintáχρο Dios kixin chrók'uáyéhe sín, a ntá k'uéchónta sín fe, la kjónté ikjín k'uíkon sín la ko kuítekaon sín kóchéhe sín. Mé xikaha k'uéchrónka sín kixin tí chjasintajni jehya chjasén sín.

¹⁴ Mé xikaha k'uénixja sín la tienxínni jína kixin naxa xritjeyá sín nketí chrók'óna chjasén sín.

¹⁵ A ntá tí chróxraxinkaon sín tí chjasin tsík'axrjexín sín ntá jína chrókjan sín ntiha inaá.

¹⁶ Kjánchó tjinkaon sín ijnko chjasin antsí má jína, tíha mé chjasin nkaya nkajní. Méxra Dios

§ 11:8 Génesis 12.1-5 * 11:9 Génesis 35.27 † 11:11 Génesis 18.11-14; 21.2 ‡ 11:12 Génesis 22.17

la tósuèhya ch'án kixin chrókjuinçek'in sín ch'án tí Dios kuènte tí jehe sín, kixin ó tjechónhen tí chjasin ts'áyéhe tí jehe sín.

17 **A** ntá fe k'uéchónta ch'ín Abraham kixin Dios kjuích'e prueba tí jehe ch'án kjuanchia tí xjeen ch'án Isaac, a ntá kjuikao ch'án chrók'óyán ch'án, chrókjuanjón ch'án. Tjechónhen ch'án chrókjuanjón ch'án kjónté jnkokoáxón xjeen ch'án tsíkjanjón Dios § tsintáchro kixin:

18 “Tí ch'ín Isaac ts'axrjeníxin nchónhya xjan.”*

19 **A** ntá ch'ín Abraham kjuátsoan ch'án kixin Dios imá chóna kjuachaxin, la kjónté chojni tsík'en na nchexechón ch'án, la éxí yóhe chrók'uen tí xjeen ch'ín Abraham ntá chrók'uáyéhe ch'án ínaá.

20 **A** ntá tí fe k'uéchónta ch'ín Isaac kjuíncheyaon ch'án tí xjeen ch'án ch'ín Jacob la ko Esaú, kixin jína ts'ejó sín.†

21 **A** ntá tí fe k'uéchónta ch'ín Jacob tió chjina its'en ch'án kjuíncheyaon ch'án jnkojnko tí xjeen ch'ín José, a ntá tí nta tjixin ch'án kjuisójixín ch'án nixjehe ch'án Dios.‡

22 **A** ntá tí fe k'uéchónta ch'ín José tió chjina its'en ch'án tsintáchro ch'án kixin tí sín israelita la chr'éxín ts'axrjexín sín chjasin Egipto, tsík'etoan ch'án kixin tió sátsji sín la sátsjiko sín tí huesoé ch'án. §

23 **A** ntá tí fe k'uéchónta it'é la ko ìné ch'ín Moisés tió kokjíhi ch'án kjuak'emā sín ch'án iní nitjó kixin tsík'íkon sín kixin ijnko xjan ntoa náxrjón tsjehe

§ 11:17 Génesis 22.1-14 * 11:18 Génesis 21.12 † 11:20 Génesis 27.27—29,39-40 ‡ 11:21 Génesis 47.31—48.20 § 11:22 Génesis 50.24-25

ch'án, la ko chrakuenhya sin tí nkehe tsík'etōan tí ch'ín rey kixin chrók'óyán sín xjan.*

24 **A** ntá tí fe k'uéchónta ch'ín Moisés tió kónteto ch'án la chrohya ch'án its'in ch'án xjeen tí tjan xjeen ch'ín rey Egipto.†

25 Náhí. Kjueyá ch'án kixin kjónté chrókjuasóteko ch'án tí sín tinkáchónki Dios, la kóxrjienhya ch'án kixin séhya náxrjón chrókjuak'e ch'án chrókjuasin ch'án jie. Náhí.

26 Kjuenkayáxin ch'án kixin antsí tjetōan chrókjuasótexín ch'án tí tinkáchónki ch'án tí Cristo itsi chr'éxin, a ntá kánhyó tjetōan chróchónta ch'án kaín nkehe tjete siín chjasin Egipto. Kjuenkayáxin ch'án kixin chrók'uáyéhe ch'án tí nkehe chrókjuanjon Dios.

27 **A** ntá tí fe k'uéchónta ch'ín Moisés sákjuixin sín tí chjasin Egipto,‡ chrakonhya ch'án kjónté kónínkaon tí ch'ín rey, a ntá kuítóehya ch'án tí tinkáchónki ch'án Dios kixin éxi t'ikon ch'án tí Dios ninkexró t'ikonhya.

28 **A** ntá tí fe k'uéchónta ch'ín Moisés kjuasin ch'án tí kia pascua, k'uetoan ch'án kixin chrókuikjanjin sín jni tí puerta, kixin tí ángel t'óyán chojni chrókjuincheníehya nijnko tí xjan saō kuènte tí sín Israel.§

29 **A** ntá tí fe k'uéchónta tí sín israelita k'uátòye sín tí Ntayaon Kjátse kixin k'óna nche xamá, a ntá tió tí sín Egipto tjinkaon sín chróchréhe sín xikaha la kjánchó kjuínhin sín tí ntā a.*

* **11:23** Éxodo 1.2; 2.2 † **11:24** Éxodo 2.10-12 ‡ **11:27** Éxodo 2.15
§ **11:28** Éxodo 12.21-30 * **11:29** Éxodo 14.21-31

30 A ntá tí fe k'uéchonta tí sín israelita la xítjen tí tjat'ò t'inkákuènxín tí chjasin Jericó, tió kjuixin k'uántatjen sín yato yaon tí chjasin a.†

31 A ntá tí fe k'uéchónta tí tjan Rahab, na mé ijnko tjan k'uéchónta nchónhya chojni ntoa, ntá k'uénkohya tjan kaín tí sín jiehe kuítekakonhya, kixin tsíkjanjon tjan kjuachaxin kixin kjuaxróxin tsíkitohe ntoe tjan tí sín israelita kjuíjitsàya sín tí chjasin Jericó.‡

32 ¿Nkehe naxa chróntáxrjan? Sintak'itjáyan tiempo naxa chrónixja kuènte ch'ín Gedeón, la ko ch'ín Barac, la ko ch'ín Sansón, la ko ch'ín Jefte, la ko ch'ín David, la ko ch'ín Samuel, la ko tí sín profeta.

33 Kixin tí fe k'uéchónta tí jehe sín kjuacha sín k'uetoan sín jína ókjé chjasin, la ko jína kjuínchekitoexín sín ijje chojni, la ko k'uáyéhe sín tí nkehe tsintácho Dios kixin tsjanjon ch'án, la ko k'uikjehe sín ir'va koxra,

34 la ko k'uanka tí xrohi chróchexín sín, la ko kjuachahya tí espada chrók'uènxín sín. A ntá tí sín chrakon la kófuerte sín, k'óna sín chojni tsehe kjuacha sín kjuánjonko sín tí sín soldado tsíkjin ókjé.

35 Kjaxin k'uék'ixin chojni chjin k'uáyéhe inaá tí chojni tsík'en kuènte sín tsíxechón inaá.

A ntá í so sín la kjuasote sín k'uénxin sín kixin kjuínchemáhya sín kixin kuinkáchónki sín Dios kixin ó nohe sín kixin tsoxechón sín antsí jína inaá.

36 A ntá í so sín kjuasóte sín la nchónhya chojni kjuanoá tí jehe sín, la ko tsík'ekon sín la ko kjaxin

† 11:30 Josué 6.12-21 ‡ 11:31 Josué 2.1-21

cadena chróntetoxín sín k'uejóchjina sín.

³⁷ Í so sín la ixro k'uénxin sín, la í so sín cierra chrít'oxin sín, la í so sín la nchónhya nkehe kjuasótexín sín, la í so sín k'uénxin sín espada, la í so sín k'uék'aji sín tsík'inkáya sín tjoe kolélo la ko tjoe kotèntso, nòà sín, kjuasóte sín, kjuaxróxinhya la náxrxónhya k'uéjó sín.

³⁸ A ntá tí sín chjasin ntiha kjuikosáyehya tí sín a la ntá k'uínkíté sín, la tí sín a la chóntahya chjasén sín la sákjuí sín nteje, la ko jna, la ko tjo síxrxja la ko tòye.

³⁹ Kaín tí sín a kónhen sín prueba kixin á chaxín chóna sín fe la kjónté xikaha k'uáyèhya sín tí nkehe tsíntáchro Dios kixin tsjanjon ch'án

⁴⁰ kixin Dios kjuenkayáxin ch'án ijnko nkehe antsí jína kixin jehó jnkokoá chrók'uáyèkoni sín tí nkehe tsjanjon ch'án.

12

Jehó Cristo chrókuinkáchónkini

¹ Méxra tí jeheni la tsík'antátjenni nchónhya chojni tsíkjakoxin sín tí fe k'uéchóna sín, la ntá chrókuítóheni ntáha kaín tí nkehe t'inkákonhen, la ko tí jje chrókuachroeni, a ntá chrókuich'eni jína tí xra chóntani la ntá chrókuachani antsí má chrókónoheni.

² Jehó Jesús chrókuinkáchónkini kixin jehe ch'án kjuanjon tí fe chóntani kixin jína kjuakoxin ch'án kjuínchexiteyá ch'án, la kjuasótexín ch'án tí ntacruz, la kuáhya ch'án kuentá kósuèhya ch'án tí nkehe kónhen ch'án ik'uén ch'án, kixin nohe ch'án kixin tsjixin tsjasóte ch'án ntá náxrxón tsjak'e ch'án

la ko tsochéhe ch'án kixin tsjak'etjaxin ch'án tí tja chjina tí trono kuènte Dios.

³ Méxra chrókjuenkayáxinrá jahará nkexrí kjuakoxin ch'ín Jesús. Tí sín chóna jie imá kjuínchekjasóte tí jehe ch'án la kjónté jahará xikaha chrókjuasóterá la chrókóxrjéhyará chrókuinkachónkirá ch'án.

⁴ A ntá jahará naxa k'uénxinhyará tí tjanjonkoará tí jie.

⁵ ¿Á k'uitjáyanhanrá tí jahará tí nkehe ntaxraxinkaonrá Dios kixin éxí xjeen ch'án t'ikon ch'án tí jahará? Éxí ntáchro xroon itén Dios kixin: Xjeenni, tóninkákonhya tí nkehe tjentuáha Ìnchéni, chrók'uaváhya tí chrókjuentuáha ch'án.

⁶ Kixin Ìnchéni mé tjentuéhe tí sín tjuèhe ch'án la ko nchekjasóte káin tí sín ts'áyéhe ch'án ts'óna xjeen ch'án.*

⁷ Chrókuítekáonrá tí nkehe t'etōan Dios kixin Dios t'ikon kixin éxí xjeen ch'án tí jahará. ¿Á síin ijnko it'é xjan chrokjuentuéhya tí xjeen?

⁸ A ntá tí chrókjuentuáhyará Dios tí jahará éxí tjentuéhe ch'án káin tí xjeen ch'án, ntá jahará kjá jehya xjeen ch'án chaxín.

⁹ A ntá tí naxa k'uéchánjanni, na mé it'éni ntihi chjasintajni kjuentuéhe tí jeheni, la jeheni kjuikosáyeheni sín. A ntá xikaha antsí chrókjuinchexiteyéheni It'éni tjen nkaya nkajní kixin chróchóntaxínni kjuachón.

¹⁰ It'éni ntihi chjasintajni kjuentuéheni ch'án kjónté kánhyó sé éxí nkexrí kóxrjínhīn ch'án; a

* 12:6 Job 5.17; Provérbios 3.11-12

ntá It'éni Dios tjentuéheni ch'án kixin jnkojína chrók'uejóni, kixin chrók'ónani tjóá kixin jehe ch'án la tjóá ch'án.

¹¹ Chaxín ninkehó xikaha chrókjuinchekjasóte Dios tí jeheni chrókóxrjínhinni tí nantá chrókónhenni kixin tí kjuatjoté. A ntá xikaha ts'itjaxínni tí kjuaxróxin éxí ijnko nkehe náxrjón kjuachani.

Tí sín tjanoá tí kjuasáyé Dios

¹² Méxra tjisójirá tí tjára tsíkóxrjé la ko tóch'inrá chóntahya fuerza,

¹³ la ko chrókjuéyará tí ntja ntoá. A ntá tí totará níhi xitjahya tjixinrá chrókuitohe jína la ko chrókóníehya inaá.

¹⁴ Chrókóxakonhanrá kixin kjuaxróxin chrók'uejorá kaín rá, jnkojína tjóá chrók'uejorá. A ntá tí tjuáhya chrók'uejorá la xitjahya ts'ikonrá Ìnchéni.

¹⁵ Chrókóxakonhanrá kixin nijnkorá chrókuitoéhyará tí kjuasáyé Dios la ko nijnkorá chrók'ónahyará éxí ijnko nuèe ka tsjá chónta veneno chrókóníexín tí í so chojni.

¹⁶ Nijnko tí jahará chrókjuásinkoará jie ijnko chojni chjin ókjé, la ko chrókjoniéhyará tí nkehe tjóá éxí kjuích'e ch'ín Esaú, kixin jnkokoá comida kjuínchekjixin ch'án tí nkehe chróchónta ch'án kixin xjan saó jehe ch'án.†

¹⁷ Jahará ó nohará kixin chr'éxin, tíó tjinkaon ch'án kixin chrókjuincheyaon it'é ch'án tí jehe ch'án la í xitjahya tsoyaon ch'án kixin kohya nkexrí chrók'uixitóxín tí nkehe tsikjich'e ch'án kjónté imá chrótsjánka ch'án.‡

† 12:16 Génesis 25.29–34 ‡ 12:17 Génesis 27.30–40

18 **A** ntá jahará la jehya kóchjinará éxí kóchjina tí sín israelita tí jnā jína chrótsé sín tí síchr'ákjen xrohi, tí tjen tí sítié t'inkaséyanhya la ko tí chjéhe xrinto.

19 Na ni tsíkíenhyará tí tsíntáchro trompeta, la ko tí itén Dios nixja. **A** ntá tí sín tsíkinhin tí tan a na mé chronòa sín kíxin í chrónixjahya ch'án inaá,§

20 mé xíkaha ichro sín kíxin tsjachahya sín sinchexiteyá sín tí nkehe k'uetōan ch'án kíxin “Tí nkexro tsinkátja tí jnā mé its'en, la ixrō la o chica lanza chrók'óyánxin sín, la kjónté ijnko ko tsinkátja va tí jnā la chrók'uen.”*

21 Ijnko kjuachrakon jié tí nkehe k'uíkon sín la kjónté ch'ín Moisés tsíntáchro ch'án kíxin: “Kjāxin síxrànkāna chrakonna.”†

22 **A** ntá jahará tsíkóchjineherá tí jnā Sión, tí ch-jasén Dios tjechón, mé tí Jerusalén itjen nkaya nkajní, la ko nchónhya miles ángel

23 tsíkójnkotsé sín kíxin tsochjéhe sín kjuasáyá Dios, la ko tí sín tsíkójnkotsé sín tsík'óna sín xjeen Dios saoxín ts'ínixín ihnié sín nkaya nkajní. Jahará tsíkóchjineherá Dios, jehe ch'án mé Juez sinchek-itōexín ch'án ijié kaín chojni, la ko tsíkóchjineherá tí nchakuen chojni jína ó tsíkjinchetjóá Dios,

24 la ko tsíkóchjineherá ch'ín Jesús, jehe ch'án mé nixjāxin ch'án tí pacto nixín kíxin tí ijnié ch'án k'uítji kjuínchetjuáxinni ch'án. **A** ntá antsí jína chrónkaxín tí ijnié ch'án, a ntá kánhyó tí ijnié ch'ín Abel.

25 Chrókóxakonhanrá chrókuítekákonhénrá tí nkexro tjenixja. Kíxin tí sín kjuanoá Dios

§ 12:19 Éxodo 19.16-22, 20.18-21

* 12:20 Éxodo 19.12-13

† 12:21 Deuteronomio 9.19

tió kjuínchexraxinkaon ch'án tí jehe sín ntihi chjasintajni ó la kuaáhya sín; a ntá antsí má xitjahya chrókuaáni tí chrókuitekakuenhyani tí nkexro nchexraxinkaonni kuixin nkaya nkajní.

²⁶ A ntá tí itén Dios tí yaon a kjuínchekinkí nonte. A ntá jie tsintáchro ch'án kixin: “A ntá inaá jehya nonte ó sintakinkíá. Náhi. Kjaxin nkajní sintakinkíá”,‡

²⁷ A ntá tí tsintáchro ch'án kixin “inaá” mé t'axrjexín kixin tsjakjlin ch'án tí nkehe jína tsinkí, a ntá tsítóhe ch'án tí nkehe xitjahya tsinkí.

²⁸ A ntá tí ts'áyéheni tí kjuachaxin kjuanjon Dios la xitjahya ts'ixinkí tíha. Méxra chróchjéheni Dios kjuasáya chróxraxinkaonni ch'án chróchrakonhenni ch'án

²⁹ kixin tí Dios kuènteni mé éxi ijnko xrohi tsjacha sinchek'itjáyan kaín nkehe. §

13

Nkexrí chrók'uejóni kixin chrókóchéhe Dios

¹ Méxra chrókuítóéhyará chrótuèherá kichuára.

² Chrók'uitjáyanhyará chrókuánjonrá kjuachaxin chrókuítóhe ntoará tí sín tsíkjin kjin. Mé xikaha kjuích'e iso sín la kjónté ángel tsík'áyéhe sín la kónoehya sín.*

³ Xráxinkáonrá tí sín tjejóchjina éxi kjaxinrá chrók'uejochjinakoará tí jehe sín. Xráxinkáonrá tí sín tsík'ekon éxi kjaxin tí jahará xikaha chrókonhanrá kjaxin.

‡ 12:26 Hageo 2.6 § 12:29 Deuteronomio 4.24 * 13:2 Génesis 18.1-8, 19.1-3

4 Kaínrá chróchonteherá kjuasáya tí kótehe chojni. A ntá jahará tsíkótahará la jína chrók'uejokoará kichuárá chrótjuèhérá kichuárá. A ntá tí sín tjinkaon tsochónta chojni chjin ókjé la Dios sinchekjasóte sín kixin xikaha ich'e sín.

5 Kénhyó má chrókóxrjínhanrá itsjé chichaon. Chrókócháhará kjónté tí kánhyó tsjé chontará; kixin tsintáchro Dios kixin: “Janhan na tsitoahya tí jahará la ko ts'itjáannahya tí jahará.”†

6 Mé xikaha chrakonhyani tsontáchroni kixin:
 Ìnchéni mé tjinkĩsani,
 méxra chróchrakonhyani kjónté ichrén nkehe
 chrókjuich'eheni chojni.‡

7 Chróxráxinkáonrá tí sín kjuínkĩtsa tí jahará kjuakohará sín itén Dios, chrókjuenkayáxinrá nkexrí k'uejó sín ntá xikaha chrókóyóhara sín éxi tí fe k'uéchónta sín.

8 Jesucristo mé itjen ch'an ijna la ko ijie la ko jnkochrín.

9 Chrókuítóéhyará chrókjuakohará chojni ijnko nkehe ókjé chrókuinkachónkirá. Íchá jína tí asánrá chrók'uáyéhe fuerza kixin Dios tjuahará la jehya tjetoan chrókjuinchexiteyéheni tí nkehe t'etóan nkehe sineni. Mé xikaha tí sín kjuích'e xikaha kjuínchexiteyá tí nkehe k'uítuenhen sín nkexrí chrókjóné sín la ninkehó kjuínkĩtsahya tíha.

10 A ntá jeheni chóntani í jnko altar kixin k'uenyákonhenni Cristo la ntiha kohya kjuachaxin chrókjónexín tí nchát'á kjuích'e xra nkaxenhen njnko ósé.

† 13:5 Deuteronomio 31.6 ‡ 13:6 Salmo 118.6

11 A ntá tí nchat'á t'etōan judío kjuíko sín tí ijnié ko nkaxenhen tí Cuarto Antsí Tjóá kixin tí nkehe la tsjatsen tí ijié sín. A ntá tí cuérpōé tí ko kjuakaxín sín ikon tí chjasin k'uejó sín.

12 Kjaxin Ìnchéni Jesús kjuasóte ch'án k'uénxin ch'án ikon chjasin kixin tsotjuáxin kaín ijié chojni tí ijnié ch'án.

13 Tsochréheni Ìnchéni Jesús éxí k'uénxin ch'án ikon chjasin kjónté tsjasóteni éxí kjuasóte tí jehe ch'án kjuikosáyehya sín tí jehe ch'án.

14 A ntá ntihi chjasintajni chóntahyani nijnko chjasénni chrók'uitjáyanhya; a ntá xritjeyáni tí chjasin itsi chr'éxin.

15 Méxra chrókuítóehyani chrókjuikosáyeheni Dios kixin Jesucristo k'uenyákonhenni ch'án. Tí xraxinkaonni ch'án la yóhe tí ko tsík'en tsíchjéhe sín Dios. Yóhe xikaha chrókjuanjonni kixin ir'vani ó chrókjuikosáyexínni ch'án.

16 Chrók'uitjáyanhyará chrókjuich'erá xra jína la ko chrókjuínkĩtsará kíchuará. Tí xikaha chrókjuich'erá la imá tóxrjínhìn Dios.

17 Chrókuítekákonhénrá tí sín tjakohará chrókjuinchexiteyéhérá tí jehe sín. Jehe sín mé t'ayakonhen sín asánrá kixin jehe sín la ó nohe sín kixin tsjanjon sín kuentá tí tjen Dios. Tsjínkĩtsará sín kixin tsochéhe sín sich'e sín xra la tsonínkakonyha sín. A ntá tí chrókjuinchek'ávará sín, ntá ninkehó tsjachahya sín tsjinkĩtsa sín tí jahará.

18 Nixjehérá Dios kixin tí jeheni kaín ni, kixin chaxín jína kjuenkayáxinni la ko tjinkaonni kixin jína chrók'uejóni.

19 Tjánchíá xr̄á ó ḱixin chrónixjehérá Dios ḱixin chrókjuanjon ch'án kjuachaxin ḱixin tjoka chrókjan janhan chrók'uejóni.

Tjanchia ch'án ḱixin chrókóyaon sín

20 Tí Dios tjanjon kjuaxróxin, mé tí nkexro kjuínchexechón Ìnchéni Jesucristo kjónté tsík'en ch'án, jehe Jesucristo mé tí Pastor tjetóan t'ayakonhen tí kolélo, la tí ijnié ch'án mé tsoxiteyáxin tí pacto sich'e xr̄á jnkochŕxín,

21 jehe Dios mé tsjinkítsa tí jahará ḱixin jína chrók'uejorá la ko kaín xr̄á jína chrókjuich'erá kixin xíkaha tjinkaon ch'án; ḱixin jehe ch'án t'etuñhenni ch'án kaín nkehe nkexrí tjinkaon ch'án ḱixin tí kjuachaxin chóna Jesucristo. Mé xíkaha chjéheni Cristo kjuasáya jnkochŕxín. Amén.

22 Kíchóni, xrjanóahará ḱixin tóninkákonhyará ḱixin tí palabra xrjanka sintaxraxinkáonrá. Méxr̄a ikjian tí xroon kjónté kánhyó tsjé nixja ts'ayéhérá.

23 Chrókónohará ḱixin kíchó ni Timoteo la í tjechjinahya ch'án jie. Tí tjoka tsi ch'án la tsjasánkian ch'án tí tsjasántsjahará tí jahará.

24 Nixjehérá jnkójina kaín tí sín tjítaón ntjia tjako la ko kaín tí sín kíchó ni tinkáchónki Dios. Tí sín tinkáchónki Ìnchéni tjejó Italia mé nixjahará sín.

25 Dios sintayaonrá ch'án kaín rá. Amén. Ó tjen.

**Tí Nuevo Testamento cuènte Inchéni
Jesucristo C'óna Nquìva
New Testament in Popoloca, San Juan Atzingo**

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Juan Atzingo

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

b9b09122-b3f6-59f0-9594-749907b32b5b